


Mes piz: Piz d'Esan

DA GIANNA DUSCHLETTA

■ Maieustus stat el là, sur l'entrada dal Parc naziunal e surveglia tut quels ch'entran e sortan. Sin il cunfin tranter S-chanf e Zernez guarda'l si vers l'Engiadin'Auta e giu en la Val Trupchun. Per mintga S-chanfrigner è il Piz d'Esan in cumpogn dal mintgadi. Cun ir tras vischnanca ansuonda'l, el fa gia bunamain in pau tema. Ma bel è el apunta schon, saja la damaun marvegl cura ch'el cucca or da la tschajera, ubain la saira cura ch'el glischa en ils davos razz da sulegl. Muments, nua ch'ins pudess dir «Guarda tge bel, il Piz d'Esan!» – da quels muments datti mintgadi. Quai sai jau or d'atgna experientscha perquai ch'jau hai udì quella frasa mintgadi da mia vita a S-chanf. Pli probabel la frasa preferida da mia mamma, fascinada da la bellezza che sa transfurma cun la glisch e las nivlas enturn il piz. Jau però senza gnerva dad udir adina puspè la medema frasa sur dad in crappun che na sa mida mai. Gnanc ir si na pon ins sin questa muntogna perquai ch'ella è en il Parc naziunal! Damai na poss jau betg dir ch'il Piz d'Esan saja stà mes bun ami durant mi'uffanza. Però ussa, suenter ch'jau hai vis il grond mund e che jau sun tur-



ILLUSTRAZIUN FMR

nada dad in viadi en mes pitschen mund da S-chanf, ussa guard jau auter si per il Piz d'Esan. El na smanatscha betg pli, forsà ma pertgira el perfin. Cun ir a far gitas sin las muntognas visavi han ins la meglra vista, davent da Griatschouls e Murter. Mintga giada cun ir si da là, e mintga giada cun ir tras S-chanf, pudess jau be dir: «Guarda tge bel, il Piz d'Esan!»

Cifras e fatgs

| | |
|-----------|--|
| Num: | Piz d'Esan |
| Autezza: | 3127 m s.m. |
| Ascensiu: | Betg pussaivla, en il Parc Naziunal |

En ina pitschna seria cun il titel «Mes piz» preschenta la redacziun da la FMR quests dis mintgadi in piz – tranter Müstair e Tschamut. Quella «pizzaria» vali la paina da scuvrir questa stad da «distanza», cun chaminar enfin sisum u alura era mo cun contemplar ils piz da sutensi, sco lieu da desideri.

